

दिनांक 07.02.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा विधानसभा मांय राज्यपाल रा अभिभाषण माथे व्ही बहस रो जवाब दीनो-सरकार रा एक साल रा कामकाज ने जनता रा भला रो बतायो।
- फोन टैप करण रा मामला माथे विधानसभा मांय हंगामो-विपख रा सदस्य मामला री जांच री मांग कीनी-सत्ता पख मुद्दा ने बेबुनियाद बतायो।
- आरबीआई रेपो रेट साढ़े छह फीसदी ऊं घटा र सवा छह फीसदी कीनी-रेपो रेट मांय करीब पांच साल पाछे कटौती करी ज्यी।
- दौसा मांय सात हजार किलोग्राम ऊं बत्तो गैर-कानूनी डोडा-पोस्त ज़ब्त करी ज्यो।

000

मुख्यमंत्री भजनलाल शर्मा राज्यपाल रा अभिभाषण माथे व्ही चर्चा रो आज विधानसभा मांय विपख रा हंगामा बीचे जवाब दीनो। मुख्यमंत्री कह्यो के वां रा राज मांय वंचित, पीड़ित, मजदूर अर पिछाड़ी तबका री जनता रा भला सारू लगातार काम कर्यो जावेला। केंद्रीय बजट मांय प्रदेश रो जिक नी व्हेवण रा विपख रा आरोप रा जवाब मांय श्री शर्मा कह्यो के जल जीवन मिशन रा तैत काम करावण बाबत राज्य ने चोखी रकम मिली है। ई सागे ई केंद्रीय करां मांय राज्य री भागीदारी ई बध र 85 हजार 716 करोड़ रुपया व्हे जावेला। वे कह्यो के केंद्रीय बजट मांय करी ज्या प्रावधानां ऊं जनता बत्तो खर्चो कर सकेला अर विकास रो गेलो साफ व्हेला। विपख कानी ऊं उठायी ज्या केई मुद्दां रा जवाब मांय मुख्यमंत्री कह्यो के कांग्रेस केवल वायदा कीना, पण मौजूदा सरकार जो कह्यो है वां ने करण माथे भरोसो करे है।

.....
श्री शर्मा कह्यो के संशोधित ईआरसीपी सारू मध्यप्रदेश अर केंद्र सरकार सागे करी ज्यो एम ओ ए कोई ई देख सके है।

मुख्यमंत्री कह्यो के लारला एक साल मांय पूरी साफ-गोई सागे नौकरियां दीरीजी, जिण रो ब्यौरो कार्मिक विभाग री वेबसाइट माथे देख्यो जा सके है।

.....
मुख्यमंत्री रा जवाब री बगत विपख रा सदस्य वेल मांय आ र फोन टैप करण रा मामला री जांच री मांग करता थकां नारा लगाया। रीत मुजब मुख्यमंत्री रा भाषण ऊं पैली विपख रा नेता ने ई बजट माथे व्ही बहस मांय शिरकत करणी ही, पण वे शिरकत नी कीनी। विपख रा सदस्य ई मुद्दा माथे मुख्यमंत्री ऊं जवाब देवण री मांग कीनी, जद के सत्ता पख रा विधायक ई मुद्दा ने बेबुनियाद बतायो। इण ऊं पैली नगरीय विकास अर आवासन मंत्री झाबर सिंह खर्वा सदन ने बतायो के प्रधानमंत्री आवास योजना रा पहला दौर रा तैत प्रदेश मांय 2 लाख 88 हजार 550 मकान बणावण री मंजूरी दीरीजी ही, ज्यां मांय ऊं हाल ताई एक लाख 96 हजार ऊं बत्ता मकान बणा दिया ज्या है, जद के 73 हजार ऊं बत्ता मकान बण रहया है। वे बतायो के योजना रा पहला दौर मांय बण रहया मकानां रो काम बेगो ई पूरो करायो जावेला। सदन मांय भूजल मंत्री कन्हैया लाल बतायो के राज्य मांय जमीं हेटे ऊं पाणी काढबा री रेट डोढ सौ फीसदी रही है।

वे कह्यो के सरकार जमीं हेटे पाणी रो लेवल बधावण अर बिरखा रो पाणी बचावण सारु असरदार तरीका ऊं काम कर रही है। ग्रामीण विकास राज्यमंत्री ओटाराम देवासी बतायो के प्रदेश मांय मनरेगा रा तैत करीब 85 लाख जॉब कार्ड काम कर रह्या है। विधानसभा रा बजट सत्र रो पहलो दौर आज खत्म व्हे ग्यो। सत्र रो दूजो दौर 19 फरवरी ऊं व्हेला जिण ई दिन राज्य रो माली साल 2025-26 रो बजट पेश कर्यो जावेला।

000

त्रिवेणी संगम महाकुंभ मांय हाल ताई 40 करोड़ ऊं बत्ता जातरु आस्था री डुबकी लगा चुक्या है। प्रयागराज मांय संकरात, मौनी अमावस अर वसंत पंचमी रे मौके व्ह्या तीन अमृत स्नान पाछे ई जातरुआं रो उमाव बण्योडो है। 13 जनवरी ऊं सरु व्ह्यो महाकुंभ 26 फरवरी ताई चालेला। मुख्यमंत्री भजनलाल शर्मा रो मंत्रिमंडल रा सदस्यां अर भारतीय जनता पार्टी रा विधायकां सागे काल प्रयागराज जावण रो कार्यक्रम है। वां रो महाकुंभ मांय पवित्र स्नान करण अर राजस्थान मंडपम मांय मीटिंग करण रो कार्यक्रम है।

000

भारतीय रिजर्व बैंक-आरबीआई नीतिगत रेपो रेट मांय 25 आधार अंकां री कटौती कीनी है। ई पाछे अब रेपो रेट साढ़े छह री बजाय सवा छह फीसदी व्हे ग्यी है। रेपो रेट मांय कटौती करीब पांच साल पाछे करीजी है। रिजर्व बैंक रा गवर्नर संजय मल्होत्रा री अगुवाई वाळी मौद्रिक नीति समिति री मीटिंग मांय रेट घटावण रो फैसलो करी ज्यो। पांच फरवरी ऊं तीन दिन ताई चाली मीटिंग पाछे आज मुंबई मांय श्री मल्होत्रा खबरनवीसां ने आ जाणकारी दीनी। वे कह्यो के देश मांय पर्याप्त उत्पादन रो बूतो है। वे कह्यो के टैक्स मांय राहत मिलण ऊं विकास मांय मदद मिलेला। रिजर्व बैंक रा गवर्नर कह्यो के साल 2025-26 सारु हाल ही मांय केंद्रीय बजट मांय ऐलाण करी ज्यी एक लाख करोड़ रुपया री कर राहत रो महंगाई माथे कोई खास असर नी व्हेला।

श्री मल्होत्रा बतायो के देश मांय महंगाई कम व्ही है अर आवता माली साल मांय हालात और सुधरण री उम्मीद है। वे कह्यो के चालू माली साल सारु जीडीपी मांय बधोतरी री रेट छह दशमलव चार फीसदी रेहवण री संभावना है। बैंकिंग धोखाधड़ी ऊं बचबा सारु श्री मल्होत्रा रिजर्व बैंक कानी ऊं भारत रा बैंकां सारु खास इंटरनेट डोमेन **बैंक डॉट इन** लागू करण रो ऐलाण कीनो। आरबीआई ई साल 24 फरवरी ऊं सरु व्हेवण वाळा वित्तीय साक्षरता सप्ताह रा तैत माली फैसला लेवण अर घरेलू बजट बणावण मांय महिलावां री भूमिका माथे खास ध्यान देवण रो फैसलो ई कीनो। श्री मल्होत्रा सगळा बैंकां ऊं **"वित्तीय साक्षरता महिलाओं की समृद्धि"** मुद्दा माथे चलाया जावण वाळा ई अभियान मांय शिरकत करण बाबत कह्यो।

000

देश मांय जापा रे दौरान मायड़ां री मौत री रेट मांय 83 फीसदी री कमी आई है, जद के दुनिया मांय लारला तीस साल मांय 42 फीसदी री कमी आई। स्वास्थ्य अर परिवार कल्याण मंत्री जगत प्रकाश नड्डा लोकसभा मांय एक सवाल रा लिखित जवाब मांय आ जाणकारी दीनी। नड्डा कह्यो के इण ई मियाद मांय नुवा जन्म्या टाबर-टाबरियां री मौत री रेट ई 69 फीसदी कम व्ही, जद के दुनिया मांय इण मांय 55 फीसदी री गिरावट आई। स्वास्थ्य मंत्री इण रो श्रेय देश मांय मातृ अर शिशु स्वास्थ्य परिणामां मांय सुधार सारु करी ज्यो सरकार रा जतन ने दीनो।

000

राज्य महिला आयोग री अध्यक्ष रेहाना रियाज़ आज हनुमानगढ़ मांय जन सुणवाई कीनी। वे महिलावां ऊं जुड़्या तीस मामला सुण र अहलकारां ने जरूरी हुकम दीना। खबरनवीसां सागे बातचीत करता थकां रियाज़ कह्यो के सगळां ने महिलावां रा हकां रो मान करणो चाहिजे।

000

दौसा मांय आज नशीली चीजां री मोटी खेप जब्त करीजी। पुलिस अर सीआईडी सीबी री ओर ऊं करी ज्यी कार्रवाई रे दौरान एक कंटेनर मांय भर्या करीब चार सौ थैलां मांय भर्यो सात हजार किलोग्राम ऊं बत्तो डोडा पोस्त बरामद करी ज्यो। इण रो मोल करीब 15 करोड़ रुपया मानी ज्यो है। दौसा रा एस.पी. सागर राणा खबरनवीसां ने बतायो के अ नशीली चीजां झारखंड ऊं लायी ज्यी ही। ई मामला मांय तीन जणा ने गिरफ्तार करी ज्यो है।

000

जयपुर रो राष्ट्रीय आयुर्वेद संस्थान 50वों स्थापना दिवस मना रह्यो है। ई सिलसिला मांय आज दो दिन रो जळसो सुरू व्ह्यो। राष्ट्रीय आयुर्वेद संस्थान मानद विश्वविद्यालय रा कुलपति डॉ. संजीव शर्मा बतायो के केन्द्रीय आयुष राज्यमंत्री प्रताप राव जाधव संस्थान मांय काल व्हेवण वाळा खास जळसा मांय शिरकत करेला।

000

38वों सूरजकुंड अंतरराष्ट्रीय शिल्प मेळो आज हरियाणा रा फरीदाबाद मांय सुरू व्ह्यो। केंद्रीय पर्यटन अर संस्कृति मंत्री गजेंद्र सिंह शेखावत इण रो उद्घाटन कीनो। ई मौके शेखावत मेळा ने एकता अर रचनात्मकता री निशाणी बताता थकां पर्यटन रो केन्द्र बतायो

मेळा रो मकसद हाथ री कारीगरी अर हथकरघा ने बधावो देवणो है। अंतरराष्ट्रीय शिल्प मेळा मांय 42 देशां रा करीब 600 नुमाइंदा शिरकत कर रह्या है।

000